

Paulsh Thessalonica kuhtée akchiwakíialaxuahcheesh ala kuss baawaalaátdéehchem hinné koók iilúupeesh.

“Shóotaachi?” hek hawátam Paul huuash.

1 Awaasúalahum Thessalonica huuash kuhtée koon akchiwakíialaxuahcheesh báakukkule Baksáau Akbaatatdía dak Baxxiilaatúuash Jesus Christ ak éhcheesh hinné díiluan díiluss díawuuk.

Silvanus huua dak Timothy huua dak awáxpe koók. Hawátam Paul huuash bíik.

²Báakukkule Baksáau deéla Baxxiilaatúuash Jesus Christ kusseé hilísh báak hileén baakaanmalákuuk. Dii daásdee alakkaasáak dalásuua an dappíaxkaateesh díalakuuoh.

Christ chishíilak ammaa chilassihchéesh

³Bakúpkaatuan bale baa íchisse al ii díalaakissuuash baatcháachik an bach aláchissuuash dak ihéesh al aláchissalakuuash dak. Heem Akbaatatdía kusseé ii “Ahóoh.” baailuk baa ala kootkaáshim. Kal an díawaawíilush daacheesh koók díiluh an baa dáhkalattuuash apáalak axxaalawák íwahkaatum. ⁴Heem kala ko ii bíiluh ii

dii balíwasitchiwuuk kala shóonmaau Akbaatatdía is bilaxpáakeesh bíotatchee. Kukkan ii dii balaáhuuk. “Datchítdeessuuk. Baa kaláttak baailíssheehkaak baa an baalúua ahchúss daáut kukkala koowéessuuk.” baak baachiweéiluk.

⁵Kala hinnéek ii baa xíassaak Akbaatatdía kal an baa chilassihchéesh kal annawitáahile hileen ammaa ala chúuss daláalahkuuash kúh “Dii baa annawík.” haak an bacheeítcheesh dii baa achíhkuuk. ⁶Akbaatatdía kal ala kootáhcheesh hileen ak dii baailíssheehcheleesh iiléen bakáleesh díak kúh baailíssheehcheihmaachik. ⁷Heelak díiluk kan díhchisshilohmaachik. Bíluh balee kooták an baawilíssuuash kan bach hilakatdák kan balíammatchisshiiwohmaachik. Ala hilíataawilikkuuwíash koottannák Baxxiilaatúua Jesus báakukko ko Baaiiwaakoochihtéesh koon iikusták bilaxpáakiaxpawisheesh áxpak huulák tak baatcháachiwík. ⁸Kala ammaa bakálaa díash koók. Akbaatatdía ak alaaxtáleesh bale iichiweeítchikaateesh Baxxiilaatúua Jesus is baa al iichiwéesh ak iikukkuwíasseesh bakáleesh kan díaihmaachik. ⁹Ko hileen bilaxpáakeesh kal ala kxawíash kalako kuhtaa daáuk. An baailíssuuash is baapúuash kal ítchileettaahile kal ii baa koochihták. Baxxiilaatúua Jesus ishóocheen kalakoon dashpák ihaáxxiolak an baatcháacheesh kal ii ala sáasshiash al ítchikaateesh éhkuuleete ii baa koochíhták. ¹⁰Baapbaatcháachim ala chisshíash kalakoon kala hileen xaxúua kootíohmaachik. Ko baapéesh chissáak heelak is bilaxpáakeesh héeleen ak kalátcheesh xaxúua dáasheesh báaxxiakissak baaihkammáatuua baatcháachiihmaachik. Buúla baa al ii baachiwaáum dáhkalattuuash koók. Heem díiluh dii héeleelohmaachik. ¹¹Hilíatam kalako ii bahchiwakáawalakbakaauk. Akbaatatdía hilísh an dii an bilaxpáakuuash dii kuxsalákak dii baa annawíak hinna bale chiwakíim dii díahchekissuuash díalaaitchilaloh. An baatcháacheesh ii dii kuxsalahkák bale baa kalátchem kal ii baam íttuum díaluuash iháannakuuoh. ¹²Heelak kal íwahkootdak an dii an bilaxpáakuuash íttak heelak kuhée kan Baxxiilaatúua Jesus dáasheesh kan báaxxiilaak chiwakálaa díiluh al íttaacheesh kan daliíok. Akbaatatdía

deéla Baxxiilaatúua Jesus Christ kal an dii daásdeekaasuuash ammaa díalakuuash íwahkootak.

ak baa kxawíiash

2 Kuhée hilaakée hinna Baxxiilaatúua Jesus Christ is baapéesh ala chissáak an balee bach aahiiák balee kulutchiwíash kuhtaalichéesh kalako ii balíwiawaak. ²Bakpúkaatuu baa dii baachiweewiáwuuk Díikukkawakaalah. “Baxxiilaatúua kala chissíik.” huulak ii dii ihaakkaáuchicheek. Dahkalattaáhuux sáapdak kalakoon kala shóotkaashdak dáalaaxtak dii baa hawátduuwiilak áalahkuuchicheek. Koochéessaalah. Kukkala “Baa áakíia awákuuk.” huu xuh kal ílala shíio xuh bínmiiluhkuuk “baa baalaáchim díoom awúualak” helitduux shóotdak. ³Kalátchessaalah. Kal an dii kúa shóocheewialolaht díassaalah. Ko baapéesh it kootássa koochihk áa bilaxpáake Akbaatatdía íhchish deéohmaachik. Akbaatatdía ak iichúuleesh bacheém baa is baaxpáaleettaahileesh dashíissaa Bilée Isée kuss déewiash kúh kalakoon iikustaaták asíitaachiihmaachik. ⁴Kan baa iichúule ii ihchi báaxxia bilaxpáake ammaa ala kalátchelichkaattuuash xaxúa is akbaatatdíoosh baa hawúuleetahkak “Bii bii baatchaatéek.” haak dáak Jerusalem hiiák Akbaatatdía aasúuash ishkawúuan awáatak “Akbaatatdía bíik.” Haak íwahkootiihmaachik. ⁵Kan dáhkalaaxtuuchicheek hinné it dii bii héeleelum dii baachiwaáush. ⁶Heeht hinné hilaakée sáapdak dúuxaashdaachik. Sáapdak élahkuuk hinné. Al íkuxxaawishim hiilák hilaa hinna bacheém batshúash iikustaachíihmaachik. ⁷Kala hilaakéehtaa hinné baa ala kxawíiash baa héeleelak an baa hiléesh kal aaláalawík. Heehtaa baam kootbíak beesh hinné kal ak dúuxaasak ak baa baa hiléesseesh iháaxxaahiolak ⁸kalakoon kala hilaa Akbaatatdía ak iichúuleesh ak baa kxawíiash asíileeihmaachik. Baxxiilaatúua Jesus ala sáashiiash baatcháatak huulák kussee ala káateesh kuhkakáatdaht ii dappeéihmaachik hinna baa kxawíiash. ⁹Hinna ak baa kxawíiash Chíisbishe an baaxpée iilíahchelak baa baatcháache ahníaihmaachik Kúh baa ii baa xíassee dak baa ala chilásuua dak baaáakíia al awákuuan ahníak al ii baa hawass kúa iishéelak íwahkoocheek.

¹⁰Bilaxpáakuum kala iháass daáum batshúalash hawass kúa iishéelak hileen bilaxpáake kúh ala kxawíiash ihch aaliíok bale iláaum koottáhileesh kalátchessaak baaleetdak hilíshialeechissaa kalátchekaattuulak iliíohmaatak kootássaak. ¹¹Kal íwahkootam kalako ii Akbaatatdía baa al iháateesh kuss dússhipik. Heem baa al iháate kalako kaláttaak heohmaachik. ¹²Heem kukkala hileen baa ala koottáhileesh ak kalátchessaak baa al iháattuash ko ítchikaashihkaak huuash xaxúa Akbaatatdía kalakoon daaskawáak Bilée Isée kuss déehcheihmaachik.

Akbaatatdía dii chilakappák dii iléewiook.

¹³Heehtaa bakúpkaatuuan díiluk ii Akbaatatdía kusseé “Ahóoh.” buuk. Akbaatatdía déssheetaa kukaa kal al íchissheesh kan baa iléewiash ko dii hawúuk. Baleiláaxbaaxpee dii baa hoowikáattaak Akbaatatdía kalakoon díi aáuk. Baa ala koottáhilee dáhkalatchekaatduuash ko ii kooták. ¹⁴Akbaatatdía kala kushko íwahkootesh kalako dii aaliíwíook. Baleiichiweéítchim ii dii awáxp iichiwaáush kalakoon Baxxiilaatúua Jesus Christ ala sáashiiash al ítchikaasheesh díiluh hawá dii ééhchekissuuk. ¹⁵Heem kal íwahkook bakúpkaatuu. Hileen ammaa dii baachiwaáush deéla díss baa baalaátak baa ala koottáhiluum an dii baachiwaáush kalako dúuxaasak kalakoon datchítdeessalah.

¹⁶⁻¹⁷Hilísh Baxxiilaatúua Jesus Christ iiaxúa deéla Biilápxuua Akbaatatdía ak balee íchissawilikkuuash kal íltaa an balee daásdeesh ko ii kootáak an daásbaatchaacheesh ii balee díahkaak haak hilísh ammaa díaittuash kootálak deéla an bahchiwakáawalakuuash baa ala sáapannialuuash ammaa ala sheelúulak al ítcheesh kalako koómnaassuulak baliatbalakuuk.

Chiwakáawilikkuuaalah.

3 Deéla bakúpkaatuu chiwakáawilikkuuaalah. Baxxiilaatúuash is baa al íchiweesh aláxalaa dée hiis dáak ii óochialitdeetak an déesh xaxúa iikukkák ii Akbaatatdía kusseé “Ahóoh.” haak an dii ala kootúuash kootíoh. ²Hinné kúh íkaalah. Bilaxpáake ham baa kalátchessaak hám batshúook. Balee an díakxawiiawíoolak

baaleeteesh ii chiwakáawilikkuuaalah. ³Heeht íwahkootuut Baxxiilaatúuash íkaak kuk dii íhchish kaláassaak an daásbaatchaacheesh ii dii díahkaak dii fassiialakuohmaachik. Baa kxawíash dii híiassaaohmaachik. ⁴Hinné bach awáxpá bahchiwakáaush kal ii dii éwahkuuk. Ammaa an dii baachiwaáush kukkan díalaak kúh koómnaassaalohmaachik. ⁵Hilísh an bahchiwakáawalakuuash Baxxiilaatúua dii kuxsalákak kalakoon aa Akbaatatdía al aláchissuuash dii óowiialakak ak dii iléesh alóolak an dalásatchutúuash díalakuoh.

Biixaxúa baa díawuulak koók.

⁶Kala hilaakée bakúpkaatuuan díikukkaalah. Baxxiilaatúua Jesus Christ kal an balee díahcheesh koók. Hilífaalah. Eehk bakúpuua hawa baapéet ittákkaa kaáilush baa hinmíassaahilak ammaa baachiwaáush díawiassaahilak huuash kooté kooxíssaak ii bíataalah. ⁷Diiluk kal élahkuuash koók. An díawuuash kalako koóttaahinnaaliilush daachik. Dii balee héeleelam bíishitdassaa baa xatáawakaaum élahkuuash koók. ⁸Deéla ak balee kuxshéesh xaxúa íwíshdiawuuk. Baa díawaak bihchi baailísshewuuk baapí dak óotchia dak an dii baailíshelitdeetbaawiawaak. ⁹Kal ii hilíatbuuash kúh baaleetdak an balee an bacheeíttaacheesh ko ii koótbaak “Balee áalahkuuliilush daachik.” baawiáwuulak kootíihmaachit koótbaassaa itchihk balee alákaak kal ii baa élahkuulak baliatuuk. ¹⁰It dii balee héeleelum kukaa kan dii baachiwaáuk. “Ak baa hinmíasseesh kúh baa duushíssuuk.” buuk. ¹¹Hinné kal ii sheewáakaasuaa baa biikukkúum éehk dii héeluaa ham íishihtak baa hinmíassaahilak kootáa baa ammaa dáhkassuuat héeleekoleetak íwahkootuuk huum xawíik. ¹²Baxxiilaatúua Jesus Christ kal an balee an díahcheesh eehk bilaxpáake bíiluh kalako díawakuuk. Chiweetáhilaalah. An bilaxpáakuuash aatáttaattaak baa hilák kal ílaa ihchi bíalítak ílaa bilaxpáakak íwahkootuulak koók. ¹³Heehaa diiluk bakúpkaatuu baa íttuum baa annawím díaluuash koowéessaakaataalah.

¹⁴Eehk dii héeluaa hám hinna baa baalaáche awuuá ammaa dii díawahkuuash díassaawialítak heoh. Kootúulak kal áxp baa hilíssaalah. Heelak batchooléek ammaa al

iháattuuash ehkaáhuulak ítchik. ¹⁵Itchihk heeht íkaak kuk kalakoon xawíihkaak hessaalah. Díinnakupuuk. Dínniitchiik baa chiweeíttaattaakuualah.

Kala chii Paulsh “Shóotaachi?” hek.

¹⁶ Ammaa baakaanmalákuuash Baxxiilaatúua kal ak baa díawilikkuuash kal iiléen kala shóoss daxátaau baa ala sáapeesh dalásuua an dappíaxkaateesh díalakak baatách al ítcheesh koochihtíialakak dii bakúteen kaalákuoh.

¹⁷Hilaakée hinné bílaataahilia baawalaátak “Shóotaachi?” baak. Díilussee an baawalaáche hinné koóm baawalaáchit an baawalaáche hilíatbaaik. kal íwahkootak. ¹⁸Hilísh Baxxiilaatúua Jesus Christ díixaxua an baalaásdeesh élahchekaatdaaliiluh.